

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XL Blg. 16
Agosto 21, 2009
www.philippinerevolution.net

Editorial

Sukdulang luho at katakawan

Hindi na masikmura ng naghihirap at nagugutom na mamamayan ang walang hangganang katakawan, luho, arogansya, pagkamanhid at pang-aabuso sa kapangyarihan ng naghaharing rehimeng US-Arroyo.

Ang galit ng taumbayan ay pinag-iibayo ng pagkakasiwalat ng walang pakundangang pagwawal-das nina Arroyo sa kabang-bayan sa huling pagbyahe niya kamakailan sa US, bitbit ang 60 mga sunud-sunuran sa kanya. Inakala nilang dahil malayo sila sa bayan ay hindi malalaman ng mamamayan sa Pilipinas ang mga pagwawalang-hiya nila roon. Nagtapon sila ng pera ng bayan sa paggamit ng mamahaling mga hotel at sasakyan at magkakasunod na mga piging sa maluluhong restawran para sa ilang ulit na pagdiriwang sa anibersaryo ng kasal nina Gloria at Mike Arroyo. Kasabay na ipinagdiwang din nila ang pagpapaunlak ng bagong imperyalistang amo ng pagkakataong mapansin at makausap na rin sa wakas ang nagsusumamong papet.


Dagdag pang gumatong sa galit ng mamamayan ang pagkakalantad ng paglobo ng kayamanan nina Arroyo mula nang maluklok siya sa poder noong 2001 at ang walang tigil pa ring paggawa ng mga paraan para higit pang makapagpaya-man, sa kapinsalaan ng lalong naghihirap na bayan.

Ang nagkandabuhol-buhol na pagpapalusot, pang-aatake at pagtatakip ng mga

tagapagsalita at alipures ng Malacañang ay lalo lamang gumagatong sa galit ng mamamayan.

Lalong hindi na mapaniwala ang lubhang naghihirap at nagugutom na nakararaming Pilipino na pina-ngangalagaan ng rehimeng US-Arroyo ang kanilang interes. Hindi mapatatanggap ng naghaharing rehimen sa mga nagtatamasa lamang ng kakarampot at bulok pang mga serbisyong panlipunan na ito ay dahil sa kakapusan ng badyet ng gubyrerno. Hindi na rin ipagtataka ng nakararaming mamamayan kung papa-ano higit na dumoble ang litaw pa lamang na kayamanan ni Arroyo at ang mas malaki pa niyang tago na kayamanan mula nang maluklok siya sa poder.

Anupamang paglulubid ng Malacañang ng mga palusot, kon-



Mga tampok sa isyung ito...

15 riple nasamsam sa reyd sa Davao del Norte
PAHINA 5

Ka Jessie, martir na kadre sa baryo
PAHINA 9

Panggigipit at diktadura sa Burma
PAHINA 9

tra-batikos at pakulo, tumimo na sa isip ng sambayanan ang lansakang katakawan, luho, kasinungalingan at kasamaan ng naghaharing pangkatin. Para sa kanila, si Gloria Arroyo ay isa na namang Imelda Marcos. Nagngangalit sila at naglulunsad ng mga protesta labas sa nakikita nilang ganid, imoral, manhid at malupit na paghahari ng reaksyunaryo at papet na rehimen.

Katulad ng pagsambulat ng lumang demokratikong rebolusyon sa harap ng ganito ring gawi ng mga dekadenteng monarkiya sa mga bansa sa Europa noong ika-17 hanggang ika-19 siglo, ang mga nasasaksihan ng mamamayan sa nag-aastang reyna ng Malacañang ay nagpapaliyab sa bagong demokratikong rebolusyong tuluy-tuloy na sumusulong ngayon sa kalakhan ng bansa. Lalong nagpapalakas ito sa pakikibaka at determinasyon ng mga rebolusyonaryong pwersa at naghihirap na mamamayang Pilipino para puspusang labanan at tuluyan nang pabagsakin ang bulok, masiba, gastador, sinungaling, abusado at mapanupil na rehimeng Arroyo. **AB**

Pagpipiging ng pangkating Arroyo

Milyun-milyong piso ang nilustay ng mag-asawang Arroyo at sangkaterba nilang mga alipures sa pagliliwaliw nila sa US noong Hulyo 30 hanggang Agosto 4. Ginawa ito ng maluho at manhid na naghaharing pangkatin ngayong pinakamataas na sa kasaysayan ng Pilipinas ang bilang ng mga nagugutom at naghihikahos, at nababalot sa malubhang krisis pangkabuhayan ang bansa at buong daigdig.

Walang patid ang pagdaluyong sa bansa ng mga balita ng kaliwa't kanang pagwawaldas ng pangkating Arroyo mula nang isiwalat ng isang pahayagan sa US ang magarbo nilang hapunan sa Le Cirque Restaurant sa New York City. Isa ito sa pinakamamahaling kainan di lamang sa US kundi sa buong mundo. Umabot sa \$20,000 (halos isang milyong piso) ang ibinayad nina Arroyo para sa kinain nilang mamahaling ulam at sa inorder nilang ilang bote ng alak. (Nagkakahalaga ng mahigit \$500 o P25,000 bawat isa nito.) Labinlima silang kumain sa restawran kaya lumalabas na gumastos para sa bawat isa ng abereyds na P66,666 sa isang hapunan lamang. Ang ginastos sa piging na ito ay kaya na sanang magpakain at bumuhay ng 3,000 karaniwang anim-kataong pamilyang Pilipino sa loob ng isang araw.

Kasunod ng pagkakasiwalat ng paglulustay nina Arroyo sa Le Cirque ay sumingaw naman ang balita hinggil sa isa pang piging sa Bobby Van's Steakhouse sa Washington D.C. noong Hulyo 30. Nagwaldas naman dito sina Arroyo ng \$15,000 o P750,000. Ang naiulat na nagbayad ng hapunan ay isang babaeng may bag na punung-puno ng dolyares—walang iba kundi si Medy Poblador. Tagapag-ayos si Poblador ng lahat ng maseselan at espesyal na atas at pati mga kapritso ng mag-asawa. Si Poblador din ang aktwal na nagbayad ng hapunan sa Le Cirque.

Lumabas sa mga sumunod pangulat na araw-araw kumakain sa mamahaling mga restawran sina Arroyo habang naroon sila sa US.

Hindi lamang sa pagkain naglustay ng malaking halaga sina Arroyo. Sa mga mamahaling hotel din sila tumigil—sa Willard Hotel sa Washington D.C. kung saan umaabot hanggang \$4,150 isang gabi ang bayad sa *suite* (pinakamahal na kwarto), at sa Waldorf Astoria sa New York City, kung saan umaabot hanggang \$4,100 bawat gabi ang *suite* ng mag-asawang Arroyo. Tig-\$990 naman kada araw ang ginastos para sa kani-kanyang kwarto ng 60 bitbit nilang mga kongresista at iba pang alipures. Umupa rin sila ng kani-kanyang *limousine* (mamahaling kotse para sa mga dignitaryo) na tuluy-tuloy na ginamit sa loob ng tatlong araw nina Arroyo at mga alipures nila.

Lahat-lahat ay umabot sa P37 milyon o lampas P6 milyon bawat araw ang inaamin nina Arroyo na



Taon XL Blg. 16 Agosto 21, 2009

Ang *Ang Bayan* ay inilalabas sa wikang Pilipino, Bisaya, Iloko, Hiligaynon, Waray at Ingles.

Maaari itong i-download mula sa Philippine Revolution Web Central na matatagpuan sa:

www.philippinerevolution.net

Tumatanggap ang *Ang Bayan* ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikauunlad ng ating pahayagan. Maaabot kami sa pamamagitan ng email sa: angbayan@yahoo.com

Nilalaman

Editorial:

| | |
|-------------------------------|---|
| Sukdulang luho at katakawan | 1 |
| Pagpipiging ng mga Arroyo | 2 |
| Walang kasimbilis na pagyaman | 4 |

Matatagumpay na opensiba

| | |
|----------------------------------|---|
| Reyd na walang putok sa DnN | 5 |
| OBL2, bigo sa Leyte at Samar | 6 |
| Usapang pangkapayapaan | 7 |
| Pagpupugay sa mga martir ng NEMR | 8 |
| Ulat koresponsal: Ka Jessie | 9 |

Pananalanta ng estado

| | |
|-----------------------------------|----|
| Panggigipit at diktadura sa Burma | 13 |
|-----------------------------------|----|

Balita

| | |
|--|----|
| | 15 |
|--|----|

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas

gastos nila sa US. Hindi pa rito kasama ang gastos ng mga myembro ng gabinete at 27 kongresistang sumama kay Arroyo.

Pinakamalaki ang ginastos nina Arroyo sa transportasyon (P13 milyon). Susunod ang gastos sa hotel na umabot sa P8 milyon. Umabot naman sa P6 milyon ang ginastos nila sa mga *tip*.

Naisiwalat din sa panahong ito ang planong pagbili ni Arroyo ng dalawang sariling eroplanong *jet* na nagkakahalagang P1.2 bilyon bawat isa. Napilitan siyang iatras ang plano nang ulanin ito ng batikos di lamang dahil luho ito kundi dahil palatandaan pa ito na balak niyang mangunypit pa sa poder.

Mga palusot. Nang unang sumambulat sa bansa ang mga balita tungkol sa mga piging at iba pang luho nina Arroyo sa US, ang kaagad na sumbat ng Malacañang ay paninira lamang ng mga prente ng mga komunista ang pagpapakalat ng ganoong mga balita. Ngunit dahil sa dami ng mga bumatikos, napilitan ang Malacañang na gumawa ng iba't ibang nagkabuhul-buhol na palusot.

Una'y sinabi nilang basta na lamang sila pumasok sa Le Cirque dahil nagkataong malapit lamang ito at bukas pa noong gabi ng Hulyo 31. Isang simpleng hapunan lamang umano iyon at hindi mama-halin. Ang totoo'y nagmamadali sina Arroyong makarating sa New York matapos ang pakikipagkita kay US Pres. Barack Obama para makahabol sa nakatakda nang pagpipiging sa Le Cirque. Reserbado na kasi ang kanilang pupwestuhan dalawang araw pa bago niyon.

Sa harap ng matinding pagbatikos sa pagwawaldas nina Arroyo, naghanap ng iba't ibang mapagpapasahan ng bintang ang Malacañang. Imbitado lamang daw sila ni Rep. Martin Romualdez at siya ang nagbayad ng nagastos. Panay naman ang iwas ni Romualdez na ma-



interbyu ng midya. Kalaunan, itinanggi niyang siya ang nagbayad, at itinuro niya ang kapatid niyang mayamang arkitektong nakabase sa New York. Wala naman sa piging ang arkitekto. Wala ring makuhang anumang beripikasyon mula sa kanya.

Para pagtakpan din ang paggastos ng Malacañang sa piging sa Bobby Van's, sinabi naman ni Rep. Danilo Suarez na siya umano ang nagbayad roon. Wala pang lumilitaw para akuin naman ang mga pagpipiging sa iba pang mamahaling restawrang pinuntahan nila.

Sobrang paggastos sa mga byahe sa ibang bansa. Lumaki pa ang isyu ng pagwawaldas ni Arroyo sa kabang-bayan nang maisiwalat na umabot na sa P3 bilyon (P1.6 bilyon lampas sa badyet) ang nagastos sa mga byahe niya sa ibang bansa mula 2003 hanggang 2008 at pinakamalaki pa sa lahat ang nagastos niya ngayong taon.

Sinabi ng Malacañang na sinagot ng Mababang Kapulungan ang gastos sa huling byahe nila, ngunit itinanggi ito ni House Speaker Prospero Nograles. Gayunman, sinikap pa ring pagtakpan ni No-

grales si Arroyo sa pagsasabing malamang na sinalo ng gubyrno ng US ang malaking bahagi ng gastos. Itinanggi naman ito ng embahada ng US.

Sa huli, ang inamin lamang ng Malacañang ay ang pagsagot nito sa mga gastos nina Sen. Miriam Santiago, Sen. Lito Lapid at Nograles. Walang sinasabi si House Speaker Nograles kung saan nanggaling ang "inabono" sa mga nagastos pero sisingilin na lamang daw nila ng tig-P300,000 ang bawat kongresistang sumama. Sinagot naman ng mga kongresista na kung sisingilin sila, kukunin nila ang pambayad mula sa pondo ng bayan dahil ang ipinunta naman daw nila sa US ay trabaho at hindi pagliliwaliw.

Mga kilos-protesta. Naglunsad ng raling iglap sa Gate 7 ng Malacañang ang may 200 kasapi ng League of Filipino Students, Anakbayan at Student Christian Movement upang kundenahin ang maluhong rehimen. Isinigaw nila ang "Gastos sa serbisyo at hindi sa luho!" Dalawampung estudyante naman ang inaresto at pinagbubugbog matapos buwagin ng mga pulis ang kanilang pagkilos.

Naglunsad din ng kilos-protesta ang Kalipunan ng Damayang Mahihirap (KADAMAY) sa Mendiola noong Agosto 17 at isang *picnic* naman ang isinagawa ng mga kasapi ng Anakpawis at Kilusang Mayo Uno bilang protesta sa hapunan ni Arroyo noong Agosto 11. Isang *mobile propaganda team* ang inilunsad ng Kabataan Party noong Agosto 10 sa mga *canteen* sa University Belt upang ipakita sa mga nana-nanghaliang estudyante ang listahan ng ginastos ni Arroyo sa pagkain kumpara sa pinagkakasya nilang mga baon. Nakakuha ng simpatya mula sa mga estudyanteng kumakain at maging sa mga mayari ng *canteen* ang MPT ng Kabataan Party. AB

Walang kasimbilis na pagyaman

Nakakalula ang bilis ng paglaki ng kayamanan ng pamilya ni Gloria Arroyo. Mula sa ₱66.8 milyon nang una siyang maupo sa Palasyo noong 2001, umabot sa ₱143.54 milyon o mahigit doble na noong 2008 ang deklarado pa lamang na halaga ng mga ari-arian ng huwad na presidente. Halos ₱11 milyon ang idinagdag ni Arroyo sa kanyang kabuuang yaman taun-taon o 20 beses na mas malaki sa kanyang sweldong ₱45,000 lamang kada buwan.

Sa deklarado pa lamang na mga pag-aari ni Arroyo, 2000% na ang inilaki ng kanyang yaman kung si-simulan ang kwenta noong 1992 nang una siyang maging senador. Ang deklarado niyang yaman noon ay ₱6.73 milyon lamang.

Ginamit niya ang kanyang kapangyarihan para magkamal ng pparaming ari-arian at kayamanan at lalo pang mapalago ang halaga ng mga ito, kasabay ang pagtatago ng mga ito sa pamamagitan ng iba't ibang paraan.

Nabunyag kamakailan ang paggamit nina Arroyo sa mga makinariya at pondo ng gubyrerno para buhusan ng mga proyektong pang-imprastruktura ang kanilang mga lupa upang mapalobo ang halaga ng kanilang ari-arian. Mula 2004 hanggang 2007, limang proyektong kalsadang nagkakahalaga ng ₱44.8 milyon ang isinagawa ng Department of Public Works and Highways (DPWH) sa liblib na sulok ng Barangay Pulo, San Rafael, Bulacan kung saan may kulang-kulang tatlong ektaryang lupa si Mike Arroyo. Gamit ang naturang "pagpapaunlad" sa lugar at pambabraso, napataas niya ang presyo ng lupa at naibenta niya ito noong 2008 sa halagang ₱1,400 kada metro kwadrado samantalang ang tumatak-bong presyuhan ng lupa sa lugar ay ₱100-250 lamang kada metro kwadrado. Kumita ng kabuuang ₱41.48 milyon sina Arroyo sa lupang nabili nila noong 1996 sa halagang

₱100,000 lamang.

Sa mga pag-aaring lote at bahay, anim lamang na nagkakahalaga umanong ₱5.7 milyon lamang ang inilista nila. Mas marami pang pag-aari at ninenegosyong lupain at bahay nila ang di deklarado, kabilang na ang maraming lote at bahay sa US na nakapangalan sa prenteng kumpanya nilang LTA-USA at marami ring mga lupain, taniman, palaisdaan at bahay sa Pilipinas na kung saan-saan nakapangalan, kabilang na ang iba't ibang prenteng *foundation*. Mayroon ding mga nakapangalan sa kapatid ni Mike na si Rep. Ignacio Arroyo. Maging ang matagal na nilang pag-aaring lote at bahay sa La Vista Subdivision sa Quezon City at sa Forbes Park sa Makati ay di deklarado. Wala ring deklarasyon sa milyun-milyon pang halaga ng mga pag-aari nilang alahas, kabayong pangarera at iba pang kayamanan.

Walang deklarasyon sa milyun-milyong kinita nina Mike at Gloria Arroyo sa pagbebenta ng mga lote, bahay at *condominium* sa US. Pinakahuli rito ang kinita nilang \$247,000 noong 2002 nang ibenta nila ang isang loteng binili nila sa San Francisco, California sa halagang \$1,428,000 noon lamang 1999.


Samantalang bawal sa batas ang pagkakaroon ng upisyal ng gubyrerno ng pampinansyang interes sa mga pribadong kumpanya, napa-

karaming hawak na mga sapi si Arroyo sa ganoong mga pribadong kumpanya. Baluktot na palusot na lamang ng Malacañang na ang may hawak at nangangasiwa sa mga ito ay di mismo si Gloria kundi ang asawa niyang si Mike Arroyo, at ang iba'y nasa pangalan at pangangalaga ng mga anak, kaya't di bangga sa kanyang pagkapresidente. Sa papel pa lamang, lumago ang mga deklaradong pag-aari niyang sapi mula ₱55 milyon noong 2006 tungong ₱62 milyon noong 2007 at tungong ₱110 milyon noong 2008. Ngunit ang litaw lamang ay ang halaga pa lamang ng pagbili. Di hamak na lumaki na ang halaga ng mga ito kung presyo sa merkado ang pagbabatayan.

Lumitaw sa pananaliksik ng Philippine Center for Investigative Journalism (PCIJ) kamakailan na ginagamit ng mga Arroyo ang La Vista Investments and Holdings at 14 pang mga prenteng kumpanya para ikubli ang marami nilang iba pang puhunan at kayamanan. Di pa kabilang dito ang bagong sikretong pinaglalagakan niya ngayon na mga kumpanya ng kroni niyang si Eduardo "Danding" Cojuangco.

May mga nakatago ring puhunan at pondo sina Arroyo sa mga bangko at kumpanya sa Dubai at sa iba't ibang bansa sa Caribbean, na dahilan kung bakit madalas na sikretong pinupuntahan ang mga ito ng pamilyang Arroyo.

Marami pang hiwaga tungkol sa kagila-gilalas na paglago ng kayamanan ng pamilyang nakaupo sa Malacañang. Napakatindi na ng galit ng mamamayan sa lalong lumalaking agwat sa pagitan ng paghihirap nila at ng lumolobong kayamanan nina Arroyo. Lalo pang ti-tindi ang galit nila habang dumarami pa ang nabubunyag. **AB**





15 riple, nasamsam sa walang putok na reyds sa Davao del Norte

Nagtamo na naman ng matinding dagok ang kampanyang Oplan Bantay Laya 2 (OBL2) ng rehimeng US-Arroyo nang maglunsad ng hiwa-hiwalay na taktikal na opensiba ang Bagong Hukbong Bayan (BHB) sa iba't ibang sulok ng kapuluan.

Pinakatampok dito ang walang putok na reyds sa Asuncion, Davao del Norte kung saan nakasamsam ang mga Pulang mandirigma ng Armando Dumandan Command (ADC) ng 15 awtomatikong riple. Kinabibilangan ito ng anim na M14, isang M16 at walong Garand. Ang limang minutong reyds ay inilunsad laban sa detatsment ng 72nd IB sa Barangay Napungas noong tanghali ng Agosto 9. Nakakumpiska rin ang BHB ng isang radyong pangkomunikasyon.

Upang tabunan ang kabiguang ito, inakusahan ni Maj. Gen. Reynaldo Mapagu, hepe ng 10th ID ng Philippine Army na nilabag ng BHB ang mga tuntunin ng digma dahil ginawang pananggalang umano nito ang mga sibilyan sa operasyong ito.

Walang gahiblang katotohanan ang akusasyon ng upisyal ng militar, ani Ka Marcela Valiente, tagapagsalita ng ADC-BHB. Malamang na ang sinasabing sibilyan ay ang isang kumander ng detatsment ng katabing

barangay ng San Miguel. Nabihag siya sa isang tsekpoynt ng BHB at isinama siya nang salakayin ang detatsment sa Napungas.

Wala ring nasaktan sa mga tropa ng militar at paramilitar dahil wala namang lumaban sa kanila sa panahon ng pagsalakay, paglililaw ng tagapagsalita.

Sumusunod ang iba pang mga ulat na natanggap ng *Ang Bayan*:

Agosto 17. Nireyds ng isang yunit ng BHB sa ilalim ng Herminio Alfonso Command (HAC-BHB) ang Traveller's Inn and Restaurant sa Kitaotao, Bukidnon para kumpiskahin ang Uzi *submachine gun* at iba pang armas ng pamilyang Nieves, may-ari ng establimento. Ginagamit ng naturang pamilya ang mga armas para takutin at pagbantaan ang mga magsasakang nakatira sa paligid. Matapos ito, inambus din ng mga Pulang mandirigma ang mga reimporsment mula sa PNP at 29th IB bandang alas-2 ng ha-

pon sa Barangay Kipolot.

Samantala, pinabulaanan ng HAC-BHB ang paratang ng 10th ID na ninakawan nila ng P22,270 ang mga Nieves. Nililaw ng HAC-BHB na mahigpit na tumatalima ang BHB sa patakaran ng pagkumpiska lamang ng mga armas at iba pang kagamitang militar na ginagamit sa kontra-rebolusyonayo at kontra-mamamayang aktibidad. Hindi nito ginagalaw ang salapi at iba pang personal na gamit ng mga tao at establisimentong target ng mga taktikal na opensiba.


Agosto 16. Tatlong sundalo ang agarang napatay at maraming iba pa ang nasugatan nang tambangan ng isang yunit ng BHB sa Aurora ang nag-ooperasyong mga tropa ng 71st IB sa Sityo Upper Dia-ayo, Barangay Galintuja, Maria Aurora, Aurora, bandang alas-7 ng umaga. Walang pinsala sa panig ng Pulang hukbo.

Para hindi mapahiya sa madla, kusang inilihim ng 7th ID ang insidente sa midya.

Sa Albay, isang sundalong myembro ng RSOT ng 49th IB na nagluluto ng almusal sa barangay hall ang tinamaan sa balakang nang isnaypin siya ng BHB sa Baryo Caguiba, Camalig, bandang alas-6:30 ng umaga. Hindi malaman ng mga sundalo kung saan pumwesto ang isnayper dahil pinaliligiran ng bundok ang barangay hall.

Agosto 13. Apat na sundalo ng 67th IB ang nasugatan, kabilang si 1Lt. Elizalde Calayo nang tambangan sila ng mga Pulang gerilya ng Front 15-BHB sa San Isidro, Baganga, Davao Oriental. Nagsasagawa sila ng operasyong militar sa Barangay Marikit sa naturang bayan nang tambangan ang kanilang sasakyang militar.

AB





OBL2, patuloy na binibigo ng BHB sa Leyte

Naglunsad ang mga Pulang mandirigma ng Mt. Amandewin Command ng Bagong Hukbong Bayan (BHB) sa Leyte ng pitong sunud-sunod at matatagumpay na aksyong militar laban sa mga tropa ng Philippine Army mula Hunyo 8 hanggang Hulyo 9. Sampung sundalo ang napatay at marami pa ang nasugatan at ilang sandata ang nasamsam mula sa mga labanan. Walang kaswalti sa panig ng BHB.

Pinabulaanan ng mga aksyong militar na ito ang ipinangangalاندان ng Armed Forces of the Philippines (AFP) na nalipol na ang BHB sa isla.


Inilunsad ang mga armadong aksyon bilang tugon ng BHB sa malawakang operasyong militar ng 19th at 52nd IB at mga *special forces* sa ilalim ng 8th ID-PA sa mga bayan ng Baybay, Burauen, Lapaz, MacArthur at Albura mula pa noong Hunyo. Bukod sa reim-porsment mula sa CAFGU, gumagamit din ang kaaway ng dalawang helikopter, mga 105 mm *howitzer* at mga *armored personnel carrier*.

Sumusunod ang mga panimulang ulat mula sa BHB-Leyte:

Hulyo 9. Pinarusahan ng kamtayan ang operatibang paniktik na si Cpl. Nelson Vacunawa sa isang espesyal na operasyon ng BHB sa Barangay Upper Sugod, bayan ng Carigara.

Hulyo 2. Napatay ang isang sundalo at nasugatan ang isa pa sa isang taktikal na opensiba sa Barangay Cagbana, Burauen.

Hunyo 28. Nagkaengkwentro ang



mga tropa ng AFP at BHB kung saan isang sundalo ang napatay at maraming iba pa ang nasugatan.

Hunyo 25. Isang sundalo ang napatay at may di tiyak na bilang ang nasugatan sa operasyong harasment ng BHB sa Barangay Bunga, Baybay.

Hunyo 20. Dalawang sundalo ang napatay sa taktikal na opensiba ng BHB sa Barangay Bunga.

Hunyo 13. Napatay sa isang operasyong harasment ang isang sundalo sa Barangay Cagbana, Burauen.

Hunyo 8. Isang sundalo ang napatay sa operasyong harasment ng BHB sa Barangay Bunga.

Bukod sa mga pinsalang natamo ng AFP mula sa mga aksyong militar ng BHB, dalawang sundalo pa ang napatay at lima ang nasugatan nang magkaroon ng *misencounter* ang mga pasistang tropa. Bunga ng mga banat ng BHB, isang kolum ng kaaway ang nahiwalay mula sa iba pang yunit at napahalo sa ibang grupo ng mga sundalo. Nagkalituhan ang hanay ng kaaway at sila ay nagkabarilan.

Ayon sa Efren Martires Command ng BHB sa Eastern Visayas, sa kabila ng malakas na pwersang militar ng AFP, demoralisado ang mga tropa ng 8th ID dahil sa mga aksyong militar ng BHB. Nabulabog ang kanilang mga operasyon at napipilitang manatili na lamang sa baryo ang mga sundalo. Samantala, mataas naman ang moral ng BHB, masang magsasaka at mga alyado dahil sa natamong mga rebolusyonaryong tagumpay.

Pinatutunayan ng mga tagumpay ng Mt. Amandewin Command sa Leyte na kaya ng pakikidigmang gerilya na suportado ng masa na pangibabawan ang todo-gera ng OBL2 ng rehimeng US-Arroyo. **AB**

Pagmimina sa Catanduanes, tinututulan

TINUTUTULAN ng mamamayan ng Catanduanes ang plano ng isang kumpanyang pag-aari ni Enrique Razon Jr., malapit na kaibigan ng mga Arroyo, na minahin ang kabuuang P15.6 bilyong halaga ng *coal* sa prubinsya. Sa pangunguna ni Obispo Manolo A. de los Santos ng Dyosesis ng Virac, binatikos ng mga Catandunganon ang paggagawad ng guberno ng 7,000 ektaryang konsesyon sa kumpanyang Monte Oro Resources Energy Inc. (MOREI) at ang planong dagdagan pa iyon ng 8,000 ektarya.

Nababahala ang mga taga-Catanduanes sa pinsalang idudulot ng pagmimina sa kagubatan laluna sa mga bayan ng San Andres, Caramoran, Panganiban at Viga na siyang sasaklawin ng proyekto. Animnapung libong ektarya na lamang ang natitirang gubat sa isla.

Nakiisa naman ang rebolusyonaryong kilusan sa pagtutol ng mga Catandunganon sa naturang proyekto. Ani Ka Greg Bañares, tagapagsalita ng NDF-Bicol, naniniwala ang marami na si Razon ay pumeprente lamang para sa mga Arroyo na siyang tunay na may-ari ng MOREI. Aniya, ang pangkating Arroyo lamang ang makikinabang sa bilyun-bilyong kikitain sa pagmimina sa prubinsya. **AB**

Usapang pangkapayapaan, nanganganib na di matuloy

Hindi sinsero ang Gubyerno ng Republika ng Pilipinas (GRP) sa pagpapatupad ng usapang pangkapayapaan. Ayon kay Luis Jalandoni, tagapangulo ng *peace panel* ng National Democratic Front of the Philippines (NDFP), maraming palatandaan na hindi tapat ang GRP na muling ipatupad ng usapang pangkapayapaan. Nilalabag ng gubyerno ang kasunduang napagkaisahan ng magkabilang panig sa di pormal na usapan sa The Hague noong Hunyo 15 na palayain kaagad ang mga detenidong pulitikal na lalahok sa usapang pangkapayapaan.

Sa ngayon, dalawang konsultant pa lamang ng NDFP ang pinalalaya na ng GRP, sina Randall Echanis at Elizabeth Principe. Si Principe ay napalaya hindi dahil sa naturang kasunduan kundi dahil sa kanyang ligal na mga tagumpay laban sa ga-

wa-gawang mga kasong isinampa sa kanya sa iba't ibang korte, dagdag pa ni Jalandoni. Sinabi rin ni Jalandoni na malisyoso ang pagpapalaya kay Echanis dahil limitado lamang ito sa anim na buwan o habang nagpapatuloy pa ang pag-

uusap pangkapayapaan.

Di lamang inaantala ng GRP ang pagpapalaya ng mga nakakulong na konsultant. Sa aktwal ay hindi pa rin nito tinatantanan ang pagmamanman at pagdakip sa mga konsultant ng NDFP. Iligal nitong inaresto noong Agosto 1 sa Cagayan de Oro City ang konsultant ng NDFP na si Alfredo Mapano.

Habang walang ipinapakitang sinseridad ang GRP sa pagpapatupad ng JASIG, nangangahulugang hindi tapat ang GRP na ipatupad ang pulong at negosasyon. Iginigiit ng NDFP na palayain ang 22 negosyador at detenidong pulitikal bilang paghahanda sa pormal na usapang pangkapayapaan sa Oslo na gagawin sana sa Agosto 28 hanggang Setyembre 5. AB

Pakanang lokal na usapang pangkapayapaan sa Negros, binatikos

"Lumang tugtugin." Ito ang bansag ni Ka Frank Fernandez, tagapagsalita ng NDFP-Negros sa itinutulak na lokalisadong usapang pangkapayapaan ni Gov. Isidro Zayco ng Negros Occidental. Sa isang pahayag nitong Agosto 17, sinabi rin ni Fernandez na ang pakana ni Zayco ay pagsabotahe sa muling pagbubukas ng usapang pangkapayapaan sa pagitan ng NDFP at GRP na nakatakdang idaos sa Norway.

Ang pagpapatupad ni Governor Zayco ng "lokalisadong usapang pangkapayapaan" at pagbibigay ng "amnestiya para sa mga rebelde" ay nagpapakita na hindi siya interesado magpairal ng tunay at makatarungang kapayapaan nang sa gayo'y malutas ang mga ugat ng gerasibil sa Pilipinas, anang tagapagsalita ng NDF-Negros.

Pagsurender ng mga rebolusyonaryong pwersa sa Negros ang siyang layunin ng gobernador para matiwasay nilang maipagpatuloy ng pangkatin niya ang kanilang dominasyon sa ekonomya at pulitika ng buong isla. Bukod kay Zayco, kabilang sa naghaharing pangkatin sa Negros ang mga pamilyang Arro-

yo, Cojuangco, Maraño at Teves.


Ayon kay Fernandez, kinaka-sangkapan ni Zayco ang kanyang poder bilang gobernador para itulak ang programang saywar ng Office of the Presidential Assistant on the Peace Process (OPAPP) na ang sangkap ay "lokalisadong usapang pangkapayapaan" at "amnestiya."

Kinutya rin ng rebolusyonaryong lider ang pagbibigay umano ng Philippine Army at ng OPAPP kamakailan ng premyong tig-₱20,000 sa mahigit 300 pekeng "rebel surrenderee."

Ani Fernandez, isa lamang itong operasyon para makapagkamal ng kurakot mula sa pondo ng gubyerno. AB

Tigil-putukan, idineklara sa Iloilo

Ipinatutupad ang 15-araw na pagtigil ng mga opensibang militar ng Bagong Hukbong Bayan (BHB) sa bayan ng Tubungan, Iloilo para maayos na maisagawa ang *rescue and relief operations* sa mga biktima ng pagguho ng lupa, ayon sa pahayag ni Ka Ariston Remus, tagapagsalita ng Napoleon Tumagtang Command ng BHB (NTC-BHB) sa katimugang baha-



gi ng Iloilo at Antique sa Panay.

Iniutos ng NTC-BHB sa lahat ng mga yunit na kumikilos sa nasabing lugar ang pansamantalang pagtigil ng inisyatiba sa paglulunsad ng mga aksyong militar mula Agosto 10 hanggang ika-25 ng buwan. Ang gayong kautusan ay pagpapahayag ng pakikiramay sa sinapit na kalungkutan at sakripisyo ng mamamayang Tubunganon na biktima ng kalamidad. Sa kabilang banda, pinaalalahanan pa rin ang mga yunit ng BHB na maging alerto sa pagdependa at pagpreserba ng sarili sakaling patraydor na atakehin sila ng AFP.

Nagsimulang lumikas ang mga residente noong Agosto 9 mula sa mga barangay ng Igtuble, Igpahu at Molina ng nasabing bayan. Umaabot sila sa mahigit 2,000. Gumuho ang lupa sa bubunduking bahagi ng Tubungan noong Agosto 6 bunsod ng halos isang linggong tuluy-tuloy na pag-ulan. Maraming nasirang pananim, taniman at hayupan dahil natabunan ng putik at malalaking bato mula sa bundok. Iniulat na may nasirang 40 bahay.

Ayon kay Ka Ariston Remus, nanlulumo ang mga biktima dahil sa huli na ang hakbang ng nagkukumahog na mga upisyal at ahensya ng gubyerno kabilang na ang 301st Brigade at 3rd ID ng Philippine Army para lutasin ang kanilang matagal nang problema. Palagi silang nasa mapanganib na kalagayan mula pa noong Hulyo 2008 matapos manalasa ang bagyong Frank. Sa katunayan, matagal na nilang hinihiling sa lokal na pamahalaan ng Tubungan na ilikas sila sa ligtas na lugar para maiwasan ang na-kaambang sakuna.

Nangako ang NTC-BHB na tumulong sa mga biktima sa abot ng kanilang makakaya. **AB**

Pagpupugay sa mga martir ng Northeastern Mindanao

Ang sumusunod ay halaw sa pahayag ni Ka Maria Malaya, tagapagsalita ng National Democratic Front-Northeastern Mindanao Region (NEMR) nang gunitain sa rehiyon noong Agosto 9 ang Araw ng mga Martir sa NEMR. Ang araw na ito ay ika-15 anibersaryo rin ng pagkamatay ni Fr. Frank "Ka Migo" Navarro, isang paring Katoliko na naging bantog na rebolusyonaryong lider sa rehiyon.

Ang mga tagumpay sa armadong pakikibaka, rebolusyong agraryo at pakikipag-isang prente sa NEMR ay dinilig ng dugo ng mga martir ng rebolusyon. Sa halip na humina ang armadong rebolusyon sa kanilang pagkawala, lalo pa itong yumayabong dahil nahahalawan ng mga aral ang buhay at pakikibaka ng mga martir tungo sa ibayong pag-sulong ng rebolusyonaryong pakikibaka.

Nagiging modelo rin sa mga Pulang mandirigma ang kanilang matapat na paglilingkod sa mamamayan kahit nangahulugan ito ng kanilang kamatayan. Nagsisilbing inspirasyon sa kabataan, mga bagong Pulang mandirigma at buong rebolusyonaryong pwersa ang kanilang walang hanggang paglilingkod at pakikiisa sa pakikibaka ng mamamayang inaapi at pinagsasamantalahan.

Napatunayan sa karanasan na sa bawat nalalagas na buhay ng isang kasama, ng isang Pulang mandirigma, ay mas marami pa ang naninindigan at nagdadala ng sandata sa armadong pakikibaka.

Ngayong araw ang araw ng paggunita sa alaala ng lahat ng Pulang mandirigma sa NEMR na nagbuwis ng kanilang buhay para sa rebolusyon. Pagpupugay din ito sa lahat ng rebolusyonaryong nabubuhay sa paglilingkod sa mamamayan at sa rebolusyon.

Ngayong araw din natin ginugunita ang ika-15 anibersaryo ng pagkamatay ni Fr. Frank "Ka Migo" Navarro, isang dakilang rebolusyonaryong martir. Gunitain natin ito sa gitna ng matinding panunupil sa ating mga kapatid na Lumad sa lugar kung saan namulat at sumampa si Ka Migo sa Bagong Hukbong Ba-

yan. Ang nasaksihan niyang matinding pang-aapi, pagsasamantala at pagyurak sa karapatang-tao ng mga Lumad sa Lianga, San Agustin, Marihatag at Tago, Surigao del Sur ang humamon sa kanya na lumahok sa rebolusyonaryong armadong pakikibaka. Namatay si Ka Migo na isang tunay na mandirigma ng mamamayan sa pusod ng Andap Valley na lupang ninuno ng mamamayang Lumad sa NEMR.

Ngayong araw, parangalan natin ang mga martir sa rebolusyon kasabay ng pag-aalay ng buong buhay sa armadong pakikibaka hanggang sa makamit ang tagumpay. **AB**





Ka Jessie, martir na kadre sa baryo

Noong Hunyo 14, isang residente ng Baryo Bag-as ang pumanaw at kinailangang ilibing kaagad kinabukasan dahil walang nag-eembalsamo sa lugar. Iminartsa ng kanyang mga kababaryo ang kanyang kabaong tungo sa kapisang niyugan na pag-aari niya at ng kanyang pamilya. Naroon ang buong niyang pamilya—ang kanyang mga kapatid, ang kanyang asawa at mga anak.

Mula sa malayo, tila isang simpleng paglilibing lamang ang ginaganap. Ngunit kung lalapitan, hindi ito ordinaryo, kundi isang espesyal na pagpupugay sa isang kababaryo na buong buhay na naglingkod sa kanila at sa rebolusyon.

Napuno ng mga hikbi at iyak ang paligid habang pinararangan ng buong baryo si Ka Jessie, myembro ng lokal na sangay ng Partido Komunista ng Pilipinas (PKP). Hanyagang nakasuklob sa kanyang kabaong and pulang bandila ng PKP. Naroon ang buong lokal na sangay ng partido at mga kasapi ng lokal na tsapter ng Pambansang Katipunan ng mga Magbubukid (PKM). Mahigit 100 ang dumalo sa parangal.

Nagsimula ang parangal sa pagawit ng Internasyunale. Sa baryo, at gayundin sa magkakatabing barangay, laging sinisimulan ng pagawit ng Internasyunale ang halos lahat ng kolektibong aktibidad ng mga residente. Kabisado nila ang awiting ito katulad ng pagkakabisa nila sa awiting Lupang Hinirang. Sinundan ito ng iba pang mga awitin, tula na may aksyon at mga awit-galaw na inihandog sa namatay na kasama. Ang mga awitin ay mga awiting pamparangal na naglalaman ng pagpapahalaga sa buhay ng namatay na kasama at ang iniwang diwa ng pagpapatuloy ng rebolusyon.

Nagbigay ng mensahe ang kanyang mga kapatid, ang kanyang mga kasama sa lokal na sangay at maging ang mga myembro ng lokal na sangay ng PKP sa ibang lokalidad. Hindi nagawa ng kanyang asawa at mga anak na magsalita dahil sa tindi ng kanilang pagdadalamhati. Ngunit lahat sila'y nagkaisang ipagpatuloy ang diwa ng rebolusyon na iniwan ni Ka Jessie.

Matapos ang pangkulturang pagtatanghal, tinanggal ang nakatahing maso at karet sa pulang bandila bago ibalot sa bangkay ni Ka Jessie ang pulang tela. Ang mga simbolo ay papel na ginupit lamang sa isang karton habang ang pulang tela ay kurtina ng isa nilang kababaryo. Inilagay ang mga sim-

bolo sa ilalim ng kanyang kabaong. Naging bahagi na ng mga pagpaparangal ang hakbang na ito dahil sa karanasan ng baryo na hinuhukay ng mga sundalo ng AFP ang mga nakahiwalay na libingang nadadaan nila sa kanilang mga operasyon sa paghihinalang mga libingan ito ng mga nasawing Pulang mandirigma.

Sinamantala na rin ng mga Partidista at rebolusyonaryo ang pagkakataon para parangalan ang iba pang mga rebolusyonaryong martir ng nagsilbi sa kanilang baryo.

Ang libing ay koordinadong aktibidad ng lokal na sangay. Ang mga kakolektibo ni Ka Jessie ang nagplano ng parangal at sikreto na nilang ipinaabot ito sa mga kababaryo, kalapit-baryo at iba pang kasama sa lugar. Tiniyak muna nilang walang nagaganap na operasyon sa araw na iyon para mapangalagaan ang seguridad ng lahat ng mga dadalo.

Lokal na kadre

Namatay si Ka Jessie dulot ng *colitis*, isang malubhang sakit sa bituka. Sinikap siyang gamutin ng



tim medikal ng BHB ngunit dahil sa nagtataasang presyo ng gamot ay hindi niya nasustine ang pag-inom ng inireseta sa kanya. Dahil din sa kahirapan, napilitan siyang mag-trabaho sa bukid kahit may sakit na siya.

Si Ka Jessie ay isang maralitang magsasaka. Sumapi siya sa organisasyong masa noong 1977 at buong panahong kumilos noong 1979. Noong 1980, nakapag-asawa siya sa baryo at nagpasyang doon sa baryong iyon niya ibubuhos ang kanyang rebolusyonaryong serbisyo at panahon. Naging kasapi silang mag-asawa ng mga rebolusyonaryong organisasyon sa lokalidad. Ang kanyang asawa ay myembro ng Makabayang Kilusan ng Bagong Kababaihan o MAKIBAKA habang silang dalawa ay myembro ng PKM. Ang limang naging anak nila ay mga kasapi rin ng Kabataang Makabayan at PKM. Isa sa kanilang mga anak ay naging kasapi ng Bandilang Pula, isang grupong pangkultura sa baryo.

Aktibo at walang pagdadala-wang-isip na kumilos para sa rebolusyon si Ka Jessie. Naging kalakasan niya ang paggampan ng mga gawaing pangmilisya. Maaasahan siya kahit anong oras man kailanganin, laluna sa usaping panseguridad. Kabilang sa kanyang mga ginampanang tungkulin ang pag-iiskawt para sa BHB, paggiya sa mga kasama at pagmamantine ng komunikasyong pang-emergency. Nakasama na rin siya sa taktikal na opensiba.

Lagi niyang nailulugar ang mga gawain at hindi nagpapalimita sa mga partikular na problemang personal. Masipag at pinapahalagahan

niya ang paghahakot ng suplay para sa BHB. May isang panahon na naging espesyal na tagapag-ugnay siya sa pagitan ng dalawang prubinsya.

Bilang kasapi ng PKM, aktibo siya sa pagpapalago ng produksyon sa baryo, laluna sa produksyong komunal na ibinabahagi sa mga kasama sa BHB. Hindi siya madaling panghinaan ng loob kahit sa panahong may ilan sa kanyang mga kakolektibo na gusto nang tumigil. Maaasahan siya sa lahat ng panahon.

Kahit nang magkasakit na siya, ang kanyang numero unong pinanghinayangan ay ang kawalan na niya ng pisikal na kakayahang makatulong at maging bahagi ng pagtupad sa mga tungkulin ng sangay. Minsa'y nakita niyang dumaan ang ilang residente na naghahakot ng mga pangangailangan ng mga Pulang mandirigma. Malungkot niyang sinabi na "kung wala sana akong sakit, makakasama pa sana ako".

Isang mahusay na lider at kakolektibo si Ka Jessie. Mainit ang kanyang pakikitungo sa kanyang mga kasamahan sa sangay at sa buong komunidad sa pangkalahatan. May mga panahong nadadala siya sa bugso ng damdamin tuwing nakikitunggali, laluna kung nasa tamang panig siya, pero madali siyang kumilala sa kanyang mga kahinaan at lagi siyang bukas na magpuna sa kanyang sarili. Hindi siya nagkikimkim ng sama ng loob o galit.

Isang mahusay na ama at asawa si Ka Jessie. Masipag siya sa paghahanapbuhay para matugunan ang mga pangangailangan ng kan-

yang pamilya. Hindi siya mapalagay kapag wala nang maiulam ang kanyang mga anak, laluna na yaong maliliit pa. Pero maige niya itong naibabalanse sa kanyang mga gawain at tungkulin sa lokal na sangay at sa rebolusyonaryong kilusan.

Kinukumbinsi siya ng kanyang mga kamag-anak na ibenta na ang kanilang kahirapang lupa o kalabaw para makapagpagamot. Pero hindi siya pumayag dahil iniisip niya ang pangmatagalang pagkukunan ng kabuhayan ng kanyang mga anak.

Martir ng rebolusyon

Marapat lamang na bigyan ng parangal si Ka Jessie at lahat ng katulad niyang mga kadre ng partido sa mga lokalidad. Inialay nila ang kanilang buhay at maging ang kanilang mga pamilya sa pagsusulong ng rebolusyon. Susi siya at ang mga katulad niyang lokal na kadre sa pagsusulong ng rebolusyon tungo sa susunod pang antas. Itinuturo ng kanyang buhay, at ng karanasan ng kanyang lokal na sangay, na maraming suliranin sa baryo ang maaari at dapat na lutasin ng mga residente sa baryo. Sa gayon, higit pa silang makatutulong sa pag-aaruga sa mga Pulang mandirigma.

Marapat na matuto ang lahat sa bukas-loob at walang pagdadala-wang-isip na paglilingkod ni Ka Jessie sa kanyang mga kababaryo at sa buong rebolusyonaryong kilusan. Pumanaw man siya at ang mga katulad niya, ito ang kanilang pamana sa kaniang pamilya, mga kababaryo, mga kasama sa mga organisasyong masa at sa buong rebolusyonaryong kilusan. AB

Ang salaysay na ito ay bunga ng talastasan sa pagitan ng istap ng Ang Bayan at ng mga myembro ng lokal na sangay ng Partiko Komunista ng Pilipinas (PKP) sa Baryo Bag-as. Nagsumite ng isang ulat parangal ang lokal na sangay na higit pa nilang napagyaman sa pamamagitan ng pakikipagsulatan sa istap. Nagpapasalamat ang istap ng AB sa buong sangay ng PKP sa Baryo Bag-as. Ang artikulong ito ay pagpupugay na rin sa lahat ng mga myembro ng mga lokal na sangay ng Partido sa buong bansa.



Mga bakwit sa Tandag, di pa rin makauwi

Patuloy ang paghihirap ng mga Lumad na Manobo at Mandaya na nagsilikas sa kanilang mga tahanan bunga ng matinding militarisasyon ngayon sa Andap Valley, Surigao del Sur. Nagsisiksikan ngayon sila sa bakuran ng bahay ni Bishop Nereo Odchimar sa Tandag, Surigao del Sur. Iniulat na nagkakasakit at ginugutom na ang ilang daan sa 1,700 bakwit na nagmula pa sa mga mabundok na barangay ng Lianga, Tago at San Agustin ng naturang lalawigan dahil sa kakulangan na ng suplay ng gamot at pagkain. Bawat araw ay nadagdagan ang bilang ng mga maysakit, at karamihan ng mga nabibiktima ay mga bata.

Hindi pa rin makauwi ang mga bakwit dahil sa pagbibingi-bingian ng 401st Bde sa iginigiit ng mga Lumad na lisanin na ng mga sundalo ang kanilang mga komunidad na kanilang inokupahan mula nang simulan nila ang matitinding operasyong militar noong Hunyo. Sinalakay noong Hunyo ng 60 hanggang 90 sundalo ng 58th IB ang mga komunidad. Sapilitang pinapasapi ng militar ang mga Lumad sa Task Force Gantangan-Bagani Force at pinagdadala ng mga armas. Pinagbabantaan ng militar ang sinu-mang tumututol dito.

Nagpapatupad din ang militar ng blokeyo sa pagkain kung saan pinagbabawal an ang mga residente na magdala ng mahigit limang kilong bigas sa loob ng kanilang komunidad.

Dumalaw kamakailan sa

mga bakwit si Rep. Luzviminda Ilagan ng Gabriela Women's Party. Ipinaliwanag sa kanya ng mga bakwit na pwersado silang lumikas dahil sa mga karahasang militar kabilang ang pag-iistraping at paghuhulog ng mga bomba sa mabubundok na barangay ng Andap Valley. Nangako si Ilagan na maglulunsad ng imbestigasyon sa Kongreso laban sa mga upisyal-militar na ayaw tumugon sa mariing panawagan ng mga bakwit na itigil na ang militarisasyon sa Andap Valley. **AB**



Mga sibilyan, nasugatan sa pagsabog ng mortar

Nasugatan ang siyam na sibilyan nang pasabugan ng AFP ng mortar malapit sa Makasendig Elementary School sa bayan ng Pikit, North Cotabato noong Agosto 6. Walo sa mga biktima ay mga bata. Galing sa 58th IB ang naturang mortar at ang target nila umano ay mga mandirigma ng Moro Islamic Liberation Front (MILF).

Kinilala ng Bantay Ceasefire ang mga biktima na sina Sittie Ansa Sumiling, 35, at walong mga bata. Ang mga nasugatan ay dinala sa Bahay Kalinga Health Center sa Sta. Catalina Parish at sa Cotabato Regional Hospital. **AB**

Aktibista sa Cebu, ginawaran ng writ of amparo

Ginawaran ng Supreme Court (SC) ng writ of amparo si Paz Silva, isang kagawad ng Karapatan-Central Visayas na nakabase sa Cebu. Hinihiling niyang tigilan na ang panggigipit sa kanya ng militar at pulis.

Kasabay ding inutusan ng mataas na hukuman ang Court of Appeals (CA) na dinggin ang inihaing petisyon ni Silva nitong Agosto 18. Kinakailangang magpalabas ang CA ng resolusyon sa kaso sa loob ng sampung araw makaraang matanggap ang kautusan ng Korte Suprema.

Sa kanyang petisyon, sinabi ni Silva na sistematiko at malisyosong pinararatangan siya ng mga upisyal ng 302nd Infantry Brigade, ng 79th IB ng Philippine Army at ng Philippine National Police sa Negros Oriental na may kinalaman umano siya sa mga kasong pagpatay at iba pang krimen sa prubinsya.

Ayon sa aktibista, tinatakot siya ng mga ahente ng militar na palaging nakabuntot sa kanya. Pinadadalhan din siya ng mga malisyosong mensahe at sinasampahan ng mga gawa-gawang kaso, kabilang ang pagpatay daw sa isang sundalo.

Ibinasura na ng Dumaguete City Prosecutor's Office noong Hunyo 15 ang mga kaso laban sa kanya dahil sa kawalan ng ebidensya. Sa kabila nito ay nagpapatuloy pa rin ang mga panggigipit kay Silva. **AB**



Berdugong batalyon, naghahasik ng terorismo sa Rizal

Naghahasik ng terorismo laban sa mamamayan ng Rizal ang 16th IB—ang binansagang berdugong batalyon ng 2nd Infantry Division (2nd ID). Kabilang sa mga paglabag nito sa karapatang-tao ang paghahasik ng lagim sa mga kabataan at estudyante at iligal na pag-aresto at pagkulong sa mga inosenteng sibilyan.

Nitong nakaraang anim na buwan, patuloy ang mga paglabag ng berdugong batalyong ito sa buong lalawigan ng Rizal, ayon kay Arman Guerrero, tagapagsalita ng National Democratic Front of the Philippines sa prubinsya (NDFP-Rizal).

Sa isang pahayag nitong Agosto 7, sinabi ni Guerrero na nagmistula nang mga garison ng militar ang mga bulubunduking barangay ng prubinsya kung saan ang AFP ang gumagampan ng mga gawaing ehekutibo at lehislalibing mga hukom. Di pa nasisiyahan dito, bumababa ang mga tropa ng militar laluna ang mga RSOT sa mga maralitang komunidad ng Antipolo City, Rodriguez at San Mateo.

Sa ngayon, ayon kay Guerrero, naglulunsad ng mga operasyong militar ang mga RSOT kahit sa loob ng mga paaralang elementarya at hayskul. Katulad ng ginagawa nila

sa mga bulubunduking barangay, ginagawa nilang mga “command post” at detatsment ang mga *day care center*, *barangay hall* at mga pasilidad ng paaralang elementarya at hayskul. Ginagambala nito ang normal na takbo ng buhay ng mga mag-aaral, dagdag ng tagapagsalita ng NDFP-Rizal.

Sa kabiguan ng kanilang kontra-rebolusyonaryong OBL1 at OBL2, desperadong hinuhuli ngayon ng AFP ang mga kasapi ng Bagong Hukbong Bayan (BHB) na lumiliban sa gawain dahil sa mga kadahilanang medikal at nagpagamot sa mga ospital. Matingkad na halimbawa ang iligal na pag-aresto at pagkulong kina Rose Ann Gumanoy at Marilyn Anayat, na pangawang mga *hors d’ combat* at nagpagamot nang sila ay hulihin ng mga operatiba ng AFP.

Hinuhuli rin ang mga inosenteng sibilyan at mga dating kasapi

ng BHB, na matagal nang nanahimik sa kanilang buhay-sibilyan. Ang mag-asawang Ramil Cardinal at Recy Joy Menorca, kasama ang isang taong gulang nilang anak, ay iligal na inaresto, idinetine at ginigipit na magbigay ng mga pahayag kontra sa rebolusyonaryong kilusan. Kagaya nito ang ginagawa nila kina Juli Saytomo, Rodel “Bogting” Perez, Gumanoy at Anayat.

Sa sobrang desperasyon ng 2nd ID na wasakin ang rebolusyonaryong kilusan, partikular sa Rizal, hindi kataka-taka kung sa darating na mga araw ay ipipresenta sa publiko ng mga eksperto sa saywar ng militar ang mga dating kasapi ng BHB at mga inosenteng sibilyan bilang mga “*rebel surrenderee*”, ani Guerrero. Gayunpaman, tiyak na mabibigo ang pakanang ito.

Kaugnay ng deklarasyon ng rehimeng Arroyo na handa itong magbalik sa usapang pangkapayapaan, iginigiit ng NDFP-Rizal na tupdin ng rehimen ang sumusunod bilang patunay ng sinseridad nito: palayain at ipaubaya sa kanyang mga kamag-anak si Marilyn Anayat; palayain din ang mag-asawang Ramil Cardinal at Recy Joy Menorca at kanilang isang taong gulang na anak; at itigil ang mga paglabag sa karapatang-tao sa Rizal. **AB**

Paglabag sa karapatang-tao sa Leyte at Samar

Dahil sa sunud-sunod na kabiguan ng militar na puksain ang rebolusyonaryong kilusan sa Eastern Visayas, ipinatutupad dito ng 8th Infantry Division ng Philippine Army (8ID-PA) ang mababagsik na operasyong militar na bumibiktima sa maraming sibilyan.

Sa Leyte. Sa 16 na baryong saklaw ng mga bayan ng Burauen, Lapaz, MacArthur at Baybay ay pinagbabawalan ng militar ang mga residente na pumunta sa kani-

lang bukirin. Ang iilang pinapayagan ay dapat hindi lumayo nang mahigit 30 metro mula sa kanilang tahanan.

Nililimitahan ng militar ang

pagbili ng bigas mula dalawa hanggang tatlong gantang lamang sa bawat pamilya kada araw. Sinisira ang mga bahay na nadadaan ng mga sundalong nag-ooperasyon at binubunot ang mga tanim ng mga magsasaka. Inaaresto at binubugbog ang ilang sibilyan, idinedetine at isinasailalim sa interogasyon sa kampo ng militar at pilit na pinapagiya sa mga operasyon. Walang patumanggang binobomba at iniis-traping ang kabundukan ng mga naturang bayan gamit ang mga 105

mm na kanyon at dalawang helikopter.

Pwersahang pinapalikas ng militar ang mga residente ng Barangay Cagbana at Barangay Lanawan patungong bayan ng Burauen. Kinatulong ng 8th ID-PA si Fe Renomeron, alkalde ng Burauen, sa pagpapakalat ng kasinungalingan na mga nagsisukong myembro umano ng BHB ang mga residenteng nagbakwit mula sa dalawang baryo.

Sa Samar. Noong Hunyo 4, binugbog ng nag-ooperasyong tropa ng 34th IB sina Juanito Dacles, 39, kagawad ng Barangay San Andres, Motiong; at si Prudencio Gabiana, 48. Alas-7:15 ng umaga nang biglang damputin si Dacles ng mga militar habang nagtatrabaho sa kanyang bukirin. Dinala siya sa kanyang kubo at doo'y binugbog. Hinampas ang kanyang binti ng kahoy hanggang ito ay mabali. Hindi pa nasiyahan, ninakaw pa ang itak at pitaka ni Dacles.

Nadaan din noon ng militar si Gabiana sa kanyang bukirin. Tinadyakan siya sa tiyan hanggang sa maihi siya sa tindi ng sakit. Binantaan si Gabiana na papatayin siya kapag hindi niya ibinunyag ang mga pangalan ng mga dumadatang kasapi ng BHB. Habang iniimbestigahan siya, nakatutok sa kanya ang dalawang ripleng M16.

Samantala, inaresto ng militar nang walang mandamyento ang tatlong kapitan ng barangay sa Samar noong Pebrero 10. Nakilala ang mga biktima na sina Marito Igdalino ng Barangay Pusongan, Motiong; Jemie Caburubyas ng Barangay Angyap, Motiong; at Renato Fabilar ng Barangay Tutubigan, Paranas.

Bago pakawalan ay isinailalim ang tatlong upisyal ng baryo sa pitong oras na interrogasyon ni Brig. Gen. Francis Lanuza, hepe ng 801st Bde. Pinagbibintangan silang mga tagasuporta ng BHB. AB



Panggigipit at diktadura sa Burma

Walang hangganan ang kalupitan at paninikil ng huntang militar ng Burma kay Aung San Suu Kyi, halal na presidente ng Burma nitong nakaraang 20 taon. Ang partido ni Aung San, ang National League for Democracy, ang nanalo sa ginanap na eleksyon noon pang 1990 pero hindi siya kailanman pinayagan ng mga naghaharing militar na umupo bilang presidente ng Burma. Nitong nakaraang 20 taon, idinetine ng huntang militar si Aung San sa kanyang bahay (*house arrest*) sa loob ng 14 na taon.

Pinanatiling nakakulong si Aung San sa samutsaring gawagawang kaso at pagdadahilan ng hunta para ilayo siya sa sentro ng pulitika ng Burma. Ang pinakahuling sentensya ni Aung San ay nagtapos na sana noon pang Mayo pero dahil sa isa na namang hungkag na kaso, mananatili siyang nakakulong sa susunod pang 18 buwan.

Ipinataw kay Aung San ang dagdag panahong pagkakabilanggo matapos madiskubre sa kanyang pamamahay si John Yettaw, isang Amerikanong nagpumilit na pumasok sa kanyang bahay nitong Agosto.

Hindi kilala ni Aung Sun si Yettaw at wala siyang kinalaman sa pagpunta ng Amerikano sa kanyang bahay pero pinarusahan pa rin siya dahil nilabag daw niya ang mga alintuntuning panseguridad ng kanyang pagkakaa-aresto dahil pinayagan

daw niyang panandaliang magpahinga sa labas ng kanyang bahay si Yettaw.

Sinentensyahan si Yettaw ng pitong taong pagkakabilanggo pero pinakawalan din at pinauwi sa US matapos makipagnegosasyon para sa kanya ang isang senador ng US.

Dahil sa tindi ng pagbatikos mula sa loob at labas ng bansa, ibinaba ng hunta ang sentensya kay Aung San mula tatlong taon tungong 18 buwan na lamang. Pero tuso pa rin ang hakbang na ito dahil tiniyak pa rin nito na nakabilanggo pa rin ang lider pag-sapit ng eleks-





syon sa 2010. Tusong nanawagan ng eleksyon ang hunta sa susunod na taon para ipamukha sa mga bumabatikos dito na mayroong mga demokratikong proseso sa Burma.

Sino si Aung San Suu Kyi?

Katulad ni Corazon Aquino noong unang bahagi ng dekada 1980 laban sa diktadurang Marcos, naging sentro si Aung San ng kilusan laban sa diktadurang militar. Mula pa noong 1940 ang paghahari ng diktadurang militar sa Burma.

Dumaluyong ang matitinding protesta sa loob ng Burma laban sa diktadura noong 1987 matapos hambalusin ng matinding krisis sa pinansya ang bansa. Lumawak at lumaganap ang mga pagkilos ng libu-libong mamamayang Burmese para ipanawagan hindi lamang ang kaluwagan sa kabuhayan kundi ang pagwawakas sa diktadura at pagpapatupad ng mga demokratikong reporma. Kabilang sa mga iginiit ng mamamayan ang pagkakaroon ng malayang eleksyon.

Bilang tugon, itinatag ng huntang militar ang State Law and Order Restoration Council (SLORC) noong 1988 at nagdeklara ng batas militar. Ilampung libong mga estudyante, monghe at iba pang sibilyan ang pinatay sa serye ng mga masaker at mararahas na pagbuwag ng mga protesta. Nagpatuloy ang mga protesta sa gitna ng karahasan ng hunta hanggang 1989 at sa taong ito unang isinailalim sa *"house arrest"* si Aung San.

Sa kabila ng panggigipit ng SLORC, nagawa pa rin ng demokratikong kilusan sa loob ng Burma na igiit ang pagdaraos ng pambansang eleksyon noong Mayo 1990. Tumakbo at nanalo ang partido ni Aung San, sa kabila ng pagkakakulong niya at karamihan ng kanyang mga alyado. Tumanggi ang hunta na

paupuin sa pwesto ang mga nanalo sa eleksyon. Hindi nito pinalaya si Aung San at marami pang ibang detenidong pulitikal mula sa bilangguan.

Panandaliang pinalabas ng SLORC sa kanyang tahanan noong 1995 si Aung San pero inaresto rin siya muli noong 1996 habang papunta sa unang kongreso ng kanyang partido. Mahigit 200 delegado ng naturang kongreso ang kasabay na inaresto. Muling nakalabas sa pagkakaaresto si Aung San noong 2002 pero muli siyang ipinailalim sa pamamahala ng SLORC noong 2003.

Malalalang paglabag sa karapatang-tao

Si Aung San Suu Kyi ay isa lamang sa libu-libong mga detenidong pulitikal na arbitraryong inaresto at ikinulong ng SLORC nang walang pakundangan. Ayon sa mga tagapagtanggol ng karapatang-tao, umaabot sa 2,000 ang bilang ng mga detenidong pulitikal sa Burma. Nilitis sila ng mga korteng kontrolado ng hunta at karamihan sa kanila ay pinatawan ng tig-60 taong pagkakabilanggo.

Dagdag dito, libu-libong mamamayan ang biktima ng mga ekstrahudisyal na pamamaslang. Laganap ang mga masaker, laluna sa mga hangganan ng Burma kung saan pinakamalakas ang paglaban sa diktadura.

Sinisikil ng SLORC ang pinakabatayang mga karapatang sibil. Nakapailalim sa direktang kontrol nito kahit ang sangay ng hudikatura. Noong 1990 pa naganap ang huling pambansang eleksyon para sa anumang pwesto sa guberno. Hawak ng mga upisyal militar, aktibo at hindi, ang lahat ng mga pwesto sa gabinete.

Walang malayang pamamaha-

yag at bawal ang anumang uri ng organisadong pagkilos. Regular na nagsasagawa ang hunta ng mga arbitraryong panghahalughog sa mga kabahayan, paniniktik at pagmamamman sa mga pribadong sulatan at usapan sa telepono. Sinumang mapag-iinitan ng hunta ay pinagbabawalang gumamit ng telepono, kompyuter at iba pang kagamitang pangkomunikasyon.

Kahindik-hindik din ang mga krimen ng militar ng Burma laban sa mga pambansang minorya na matatag na lumalaban sa diktadura. Pangunahing tinatarget ng hunta ang mga sibilyan sa pakikidigma nito sa mga armadong grupo ng mga minorya. Daan libong mamamayan ang sapilitang lumikas sa kanilang mga lupaing ninuno para iwasan ang mga opensibang militar.

Laganap ang pamamaslang, tortyur at iba pang pisikal na pang-aabuso, pagdukot at mga arbitraryong pang-aaresto, sapilitang pagpapatrabaho at pagpapagiya, panununog ng kabahayan at buubuong mga nayon at paninira ng mga pananim. Malaon na ring gawi ng militar ang pagpapataw ng iba't ibang blokeyo para kolektibong maparusahan ang mga katutubong lumalaban sa kanila.

Gayunpaman, tuluy-tuloy ang pag-aklas ng mamamayang Bumese. Pinakahuli lamang ang pagdaluyong ng mga protesta noong Agosto at Setyembre 2007 sa tinaguriang *"Rebolusyong Saffron"*. Hango ang pangalan sa kulay ng suot ng mga monghe. Nagkulay *saffron (yellow-orange)* ang mga lansangan ng Burma sa loob ng ilang linggo sa mga protesta laban sa kahirapan at paninikil. Marahas na binuwag ang mga protesta at libu-libong monghe at kanilang mga tagasuporta ang pinaslang. **AB**

Malaking pagkatalo ng AFP sa Basilan

HALOS katatapos lamang purihin ni US Pres. Barack Obama ang tuta niyang si Gloria Arroyo sa mga tagumpay daw nito sa “anti-teroristang kampanya” sa Mindanao nang pumutok ang balita hinggil sa malaking kabiguan ng pinakahuling operasyon ng mga pwersang militar at pulis ng gubyrerno laban sa teroristang Abu Sayyaf nitong Agosto 12.

Umabot sa 400 pinagsanib na tropa ng Philippine Marines, Philippine Army at Philippine National Police ang nag-operasyon para lusubin ang pinagkukutaan ng tinatayang 150 elemento ng Abu Sayyaf sa Sityo Kurrelem, Barangay Silangkom, Tipo-tipo, Basilan. Ngunit nabigo ang operasyon at ang mga pwersa ng gubyrerno pa ang nagtamo ng mas maraming kaswalti.

Walang katotohanan ang ibinalita ng AFP na nakuha nila ang target nilang kampo ng Abu Sayyaf. Ang totoo, paparating pa lamang ang mga pwersa ng gubyrero ay pinagbibira na ang mga ito ng mga naghihintay na pwersang bandido. Hindi man lamang nila naisip na matapos nila daanan ang maraming komunidad na may mga kamag-anak ng mga bandito ay marami nang nakakita sa kanila

at nakapagbigay ng impormasyon sa Abu Sayyaf. Kaagad na nalaman ng mga bandido ang mga pwersa ng gubyrerno.

Malaking sampal pa ito sa rehimen ng US-Arroyo dahil ilang beses nang ipinagmayabang nito at ng mga punong upisyal ng AFP na kakaunti na lamang ang mga elemento ng Abu Sayyaf sa Mindanao at madali na silang magagapi. Pero mismong ang kutsabahan at pakinabang na nakukuha kapwa ng matataas na upisyal ng gubyrerno at mga pinuno ng Abu Sayyaf sa gawaing *kidnap for ransom* ang nagpapalakas sa bandidong grupo. Pangunahin na si DILG Secretary Reynaldo Puno sa mga kumakamal ng limpak-limpak na salapi bilang bahagi niya sa ransom na ibinabayad ng mga pamilya ng mga prominenteng personaheng lokal at dayuhan na dinudukot ng Abu

Sayyaf.

Higit pang malaking pinsala ang natamo ng mga pwersa ng gubyrerno nang makasagupa rin nila ang mas malakas at mas mahusay pang lumaban na mga pwersa ng MILF. Nagkamaling lusubin ng mga elemento ng Marine Battalion Landing Team 10 (MBLT 10) ang base ng MILF sa kalapit na Barangay Baguindan nang ipadala sila ng AFP para magreimpors sa mga pwersa ng gubyrerong pinagbibira ng Abu Sayyaf. Pinasisinungalingan ng MILF na nakipagkoordinang muna ang AFP sa kanila bago pumasok sa teritoryo nila. Naobliga ang mga pwersa ng MILF na magdependa ng kanilang base dahil sa biglang pag-atake roon ng MBLT 10. Ayon sa MILF, ang ginawa ng AFP ay katrayduran at paglabag sa pormal na umiiral na kasunduang tigil-putukan.

Ang kinalabasan, karamihan ng mga kaswalti (23 napatay at 22 pang nasugatan) na natamo ng mga pwersa ng gubyrerno ay idinulot ng MILF. Sampu namang mga mandirigma ng MILF ang napatay sa labanan.

Imbakan ng langis, sinugod ng kabataan

SINUGOD ng mga kabataan at estudyante sa pangunguna ng Anakbayan ang *oil depot* o imbakan ng langis ng dambuhalang kumpanyang Caltex sa Pandacan, Maynila noong Agosto 11.

Ang kilos-protesta ay ibinunsod ng panibagong pagtataas ng presyo ng langis. Nanawagan ang Anakbayan na buwagin ang kontrol ng mga monopolyong kartel ng langis sa bansa.


Nagkaroon ng kaunting tensyon nang kunin ng mga pulis ang *megaphone* at ID ng mga estudyante. Nahuli naman ng mga estudyante ang isang pulis na iligal na kumukuha ng bidyo ng kanilang protesta. Sinabi naman ng Pinagkaisang

Samahan ng mga Tsuper at Opereytors Nationwide (PISTON) na dapat suspendihin ng mga mambabatas ang *oil deregulation law*. Nagiging walang kwenta, anila, ang mga pagdinig ng Kongreso kung lingguhan namang magtataas ang mga kumpanya ng langis. Nagbanta naman sila ng panibagong tigil-pasada kung tuloy-tuloy ang pagtataas ng presyo ng langis

Samantala naglunsad ng isang *noise barrage* ang mga kasapi ng

Bagong Alyansang Makabayan-Southern Tagalog sa Los Baños, Laguna at San Mateo, Rizal. Ayon sa BAYAN-ST, umaabot na sa P5 ang itinaas ng presyo ng langis nitong nakalipas na tatlong linggo.

Naging lingguhan na ang pagtataas ng presyo ng langis ilang oras matapos ang SONA ni Arroyo noong Hulyo 27, kung saan nagtataas nang P2 kada litro. Sinundan ito noong Agosto 4 ng P1 pagtaas kada litro at P1.50 noong Agosto 11. Umaabot naman sa P9.56 kada litro ang sobra sa presyo ng *diesel* samantalang P3.57 kada litro naman ang patong sa presyo ng gasolina, ayon sa BAYAN.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XL Blg. 16
Agosto 21, 2009
www.philippinerevolution.net

Editorial

Sukdulang luho at katakawan

Hindi na masikmura ng naghihirap at nagugutom na mamamayan ang walang hangganang katakawan, luho, arogansya, pagkamanhid at pang-aabuso sa kapangyarihan ng naghaharing rehimeng US-Arroyo.

Ang galit ng taumbayan ay pinag-iibayo ng pagkakasiwalat ng walang pakundangang pagwawal-das nina Arroyo sa kabang-bayan sa huling pagbyahe niya kamakailan sa US, bitbit ang 60 mga sunud-sunuran sa kanya. Inakala nilang dahil malayo sila sa bayan ay hindi malalaman ng mamamayan sa Pilipinas ang mga pagwawalang-hiya nila roon. Nagtapon sila ng pera ng bayan sa paggamit ng mamahaling mga hotel at sasakyan at magkakasunod na mga piging sa maluluhong restawran para sa ilang ulit na pagdiriwang sa anibersaryo ng kasal nina Gloria at Mike Arroyo. Kasabay na ipinagdiwang din nila ang pagpapaunlak ng bagong imperyalistang amo ng pagkakataong mapansin at makausap na rin sa wakas ang nagsusumamong papet.


Dagdag pang gumatong sa galit ng mamamayan ang pagkakalantad ng paglobo ng kayamanan nina Arroyo mula nang maluklok siya sa poder noong 2001 at ang walang tigil pa ring paggawa ng mga paraan para higit pang makapagpaya-man, sa kapinsalaan ng lalong naghihirap na bayan.

Ang nagkandabuhol-buhol na pagpapalusot, pang-aatake at pagtatakip ng mga

tagapagsalita at alipures ng Malacañang ay lalo lamang gumagatong sa galit ng mamamayan.

Lalong hindi na mapaniwala ang lubhang naghihirap at nagugutom na nakararaming Pilipino na pina-ngangalagaan ng rehimeng US-Arroyo ang kanilang interes. Hindi mapatatanggap ng naghaharing rehimen sa mga nagtatamasa lamang ng kakarampot at bulok pang mga serbisyong panlipunan na ito ay dahil sa kakapusan ng badyet ng gubyrno. Hindi na rin ipagtataka ng nakararaming mamamayan kung papa-ano higit na dumoble ang litaw pa lamang na kayamanan ni Arroyo at ang mas malaki pa niyang tago na kayamanan mula nang maluklok siya sa poder.

Anupamang paglulubid ng Malacañang ng mga palusot, kon-



**Mga tampok
sa isyung ito...**

**15 riple nasamsam
sa reyd sa Davao
del Norte** PAHINA 5

**Ka Jessie, martir
na kadre sa baryo** PAHINA 9

**Panggigipit
at diktadura sa Burma** PAHINA 9

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa angbayan@yahoo.com